

**U ovom broju, između ostalog, čitajte:**

- **Press-konferencija UPFBiH: Odbiti zahtjeve za povećanje tarifa za prenosnu mrežarinu**
- **Ekonomsko-socijalno vijeće za područje FBiH razmatralo izmjene Zakona o porezu na dobit i inicijative UPFBiH**
- **Drugi sastanak Radne grupe za pojednostavljenje procedura prikupljanja statističkih podataka**
- **UPFBiH pripremiло projekat o medijskoj kampanji nove reformske agende i Inicijative 20+5+6**
- **Inicirani sastanci sa međunarodnim organizacijama u BiH**
- **Održan sastanak Grupacije poslodavaca USK pri UPFBiH sa kantonalnim ministrom privrede**





## UPFBiH poziva DERK da odbije zahtjeve za povećanje tarife za mrežarinu i tarife za rad NOSBiH

Udruženje poslodavaca Federacije Bosne i Hercegovine najoštrije se protivi neopravdanom i neprihvatljivom zahtjevu Elektroprijenosa Bosne i Hercegovine koji je od Državne regulatorne komisije za električnu energiju (DERK) zatražio povećanje tarife za usluge prijenosa električne energije tzv. mrežarine za oko deset posto, kao i zahtjev Nezavisnog operatera sistema u BiH (NOS BiH) koji traži povećanje tarife za rad NOS-a i tarife za sistemsku i pomoćne usluge za 2020. godinu za oko 50 posto.

Naime, Elektroprijenos BiH zatražio je o DERK-a povećanje tarife za usluge prijenosa električne energije (mrežarina) za otprilike deset posto, što predstavlja povećanje ukupnog prihoda ove kompanije za oko 25 miliona KM, dok Nezavisni operater sistema u BiH traži povećanje tarife za rad NOS-a, kao i tarife za sistemsku i pomoćne usluge za 2020. godinu za oko 50 posto, što opet predstavlja povećanje prihoda za oko četiri miliona KM.

Iz Udruženja poslodavaca Federacije Bosne i Hercegovine smatraju da je predloženo povećanje apsolutno neopravdano i neprihvatljivo te da je apsurdno da Elektroprijenos BiH kao razlog za povećanje usluga prenosa električne energije navodi isključenje Aluminija Mostar. Iz Udruženja poslodavaca FBiH, također, napominju da su u državama regiona ove tarife znatno niže nego u Bosni i Hercegovini.

„Ukoliko DERK prihvati prijedloge, to će značiti povećanje cijene mrežarine na prijenosnoj mreži i povećanje ukupne cijene električne energije od tri do četiri posto, odnosno, ukupnih troškova nabavke električne energije za sve velike kupce u BiH



priključene na visoki napon. Kao posljedica toga, u narednom koraku, bi došlo do povećanja distributivnih mrežarina, a što bi imalo direktni uticaj na sve kupce električne energije, uključujući i domaćinstva, te bi na koncu rezultiralo povećanjem cijena proizvoda i usluga", ističu iz Udruženja poslodavaca FBiH.



Shodno navedenom, Udruženje poslodavaca FBiH poziva DERK da razmotri opravdanost traženog povećanja, da se uradi analiza troškova mrežarine u državama regiona i pokazatelja poslovanja u proteklom periodu, jer iz onoga što je trenutno dostupno javnosti, opravdanost povećanja cijena tarifa se ne može ničim opravdati.

## **Press-konferencija UPFBiH: Odbiti zahtjeve za povećanje tarifa za prenosnu mrežarinu**



Udruženje poslodavaca Federacije BiH poziva Državnu regulatornu agenciju za električnu energiju BiH da pažljivo analizira zahtjeve Elektroprijenosa BiH za povećanje tarife za usluge prijenosa električne energije tzv. mrežarine za oko deset posto, kao i zahtjev Nezavisnog operatera sistema u BiH koji traži

povećanje tarife za rad NOS, da reagira na neprimjerene i nerealne zahtjeve i zaštiti krajnje kupce.

Iz Udruženja očekuju da će DERK odbiti povećanja cijena električne energije. Ovo je rečeno na press-konferenciji UPFBiH održanoj 17. januara 2020. godine u Sarajevu, a povodom zahtjeva za povećanje svih tarifa koje čine prenosnu mrežarinu, a koje su DERK-u uputili Elektroprijenos BiH i NOS.

„Kao razlog povećanja tarifa navodi se smanjena potrošnja električne energije na prenosnoj mreži u BiH zbog prestanka rada Aluminijuma, kao i da se zadrži 'profitabilno poslovanje' ovih kompanija. Pitamo da li je korektno održavati poslovanje sa značajnim profitom tako što će se samo povećati cijena mrežarine



kupcima? Postoje li drugi načini da se poboljša poslovanje Elektroprijenosa i NOS-a, optimiziraju troškovi, racionalizira broj zaposlenih itd. Ono što treba istaknuti je da će povećanjem cijena mrežarine automatski porasti cijena električne energije za kupce na visokom naponu, kao što su Arcelor Mittal, željeznice, BSI Jajce, Cementara Kakanj, Tvronica cementa Lukavac kao i ostale kompanije iz metalske, drvne i tekstilne industrije što je još jedan namet i dodatno opterećenje za privrednike i poslovni ambijent, a što će građani osjetiti dvostruko, kroz povećanje cijena električne energije i cijena proizvoda i usluga", kazao je direktor UP FBiH Mladen Pandurević.

Podsjetio je da je DERK 31. decembra 2019. godine već donio Odluku o izmjeni tarifa za sistemsku i pomoćnu uslugu kojom je ovu tarifu povećao za 12 posto, čime je prenosna mrežarina od 01.01.2020. godine povećana za cca 3,5 posto, a to opet znači da će kupci na prenosnoj mreži imati 0,5 posto veće ukupne troškove energije. Jedno od obrazloženja za povećanje je „nenaplaćena potraživanja od Aluminija u iznosu od oko 3,1 miliona KM". Kupci na visokom naponu će već u januaru imati uvećane račune za potrošenu električnu energiju.



„Ukoliko DERK prihvati ove prijedloge, to će značiti povećanje cijene mrežarine na prijenosnoj mreži i povećanje ukupne cijene električne energije od tri do četiri posto, odnosno, ukupnih troškova nabavke električne energije za sve velike kupce u BiH priključene na visoki napon.

Kao posljedica toga, u narednom koraku, bi došlo do povećanja distributivnih mrežarina, a što bi imalo direktni uticaj na sve kupce električne energije, uključujući i domaćinstva, te bi na koncu rezultiralo povećanjem cijena proizvoda i usluga. Pregledajući dokumente koje su kompanije predale DERK-u u proceduri odobravanja novih tarifa može se uočiti da je Elektroprijenos BiH tražio povećanje svog odobrenog prihoda za 16 posto u odnosu na odobrena sredstva za 2019. godinu, što je otprilike između 20 i 30 miliona KM, a NOS BiH je tražio povećanje svog odobrenog prihoda koji se procjenjuje između 3,5 i pet miliona KM", naglasio je Pandurević.

Podsjeća da su u državama regiona ove tarife znatno niže nego u BiH. Zbog svega navedenog iz UPFBiH pozivaju nadležne u DERK da razmotre opravdanost traženih povećanja, urade analiza troškova mrežarine u državama regiona i pokazatelja poslovanja u proteklom periodu, jer iz onoga što je trenutno dostupno javnosti, opravdanost povećanja cijena tarifa se ne može ničim opravdati.

Udruženje će u narednom periodu intenzivno raditi sa nadležnim u pokušaju smanjenja onih komponenti koje regulira država, a koje finansiraju trošak instrumenata energetske politike ili kanaliziraju prihod u državni budžet i koje uključuju poreze i namete, kao i troškove ispunjavanja utvrđenih kvota kako bi došli do rješenja koje će biti prihvatljivo za sve. Također će pokrenuti razgovore o preispitivanju zakona kojima je definiran rad regulatora, jer trenutno regulatori uglavnom ne odgovaraju nikome za odluke koje donose.



## Ekonomsko-socijalno vijeće za područje FBiH razmatralo izmjene Zakona o porezu na dobit i inicijative UPFBiH

Na sjednici Ekonomsko-socijalnog vijeća za teritoriju Federacije BiH, održanoj u Sarajevu 30. januara 2020. godine, razmatrane su izmjene i dopune Zakona o porezu na dobit, primjedbe Udruženja poslodavaca FBiH na izmjene i dopune pomunetog zakona, kao i inicijativa Udruženja za izmjene i dopune ovog zakona po hitnom postupku.

Također, na inicijativu Udruženja poslodavaca FBiH, raspravljalo se i o Uredbi o postupka prijema u radni odnos u javnom sektoru u FBiH, o primjedbama Udruženja na Prijedlog uredbe o naknadama za plastične kese, na Prijedlog uredbe o proizvodima koji poslije upotrebe postaju posebne kategorije otpada i kriterijima za obračun i način plaćanja naknada, kao i na Pravilnik o građevinskom otpadu.

Inicijative Udruženja možete preuzeti ovdje:

- [Primjedbe UPFBiH na Prijedlog zakona o izmjenama i dopunama zakona o porezu na dobit](#)
- [Inicijativa za izmjenu Uredbe o postupku prijema u radni odnos u javnom sektoru u FBiH](#)
- [Primjedbe UPFBiH na Prijedlog uredbe o naknadama za plastične kese](#)
- [Primjedbe UPFBiH na Prijedlog uredbe o proizvodima koji poslije upotrebe postaju posebne kategorije otpada i kriterijima za obračun i način plaćanja naknada](#)
- [Primjedbe UPFBiH na Pravilnik o građevinskom otpadu](#)

## UPFBiH pripremiolo projekat o medijskoj kampanji nove reformske agende i Inicijative 20+5+6



Udruženje poslodavaca FBiH je sredinom januara uputilo dopis sa zahtjevom za sastanak ambasadama Sjedinjenih Američkih Država i Velike Britanije u BiH, kao i Delegaciji EU u BiH, a kako bi razgovarali o projektu Udruženja poslodavaca

"Medijska kampanja promocije i monitoringa sprovedbe 'Zajedničke socioekonomske reforme za period 2019 - 2022. godina' i 'Inicijative 20+5+6'.

Obzirom da je u toku implementacija „Zajedničke socioekonomske reforme za period 2019 - 2022. godina“, čiji su ciljevi održiv i ubrzan ekonomski rast, veća konkurentnost privatnog sektora i bolje poslovno okruženje UPFBiH želi preuzeti svoj dio tereta i dati dopinos u procesu poboljšanja trenutnog ekonomskog stanja u BiH.

Udruženje je pripremiolo "Inicijativu 20+5+6" koja se sastoji od prijedloga novih, te izmjena i dopuna postojećih zakonskih rješenja koji su podijeljeni u četiri grupe: javni prihodi, privreda, rad i zapošljavanje i zdravstvo.

Usvajanje navedene inicijative rezultirat će rasterećenjem privrede, smanjenjem sive ekonomije i poboljšanjem fiskalne discipline, smanjenjem nezaposlenosti, povećanjem plata i investicija, podizanjem konkurentne sposobnosti domaće privrede, pojednostavljenjem i ubrzavanjem administrativnih procedura, kao i smanjenjem

troškova poslovanja.

Analizom ciljeva implementacije „Zajedničke socioekonomske reforme za period 2019-2022. godine“ i ciljeva "Inicijative „20+5+6“ zaključeno je da su oni u velikoj mjeri komplementarni, te da bi efikasna implementacija reformske agende po automatizmu značila i implemantaciju inicijative Udruženja.


Sroga je Udruženje priprenilo projekat "Medijska kampanja promocije i monitoringa sprovedbe 'Zajedničke socioekonomske reforme za period 2019 - 2022. godina' i 'Inicijative 20+5+6' kojim se želi se osigurati promocija i monitoring, odnosno osiguravanje



uspješne sprovedbe reformske agende i prijedloga novih i izmjena i dopuna postojećih zakonskih rješenja, čije donošenje ima za cilj rasterećenje privrede i poboljšanje poslovnog ambijenta.

Primarni cilj kampanje je promocija reformskih mjera, te usvajanje i implementacija predloženih zakonskih rješenja i inicijativa u narednih 18 mjeseci od strane izvršne i zakonodavne vlasti FBiH, kao i konstanti monitoring dinamike implementacije reformske agende. Opšta medijska kampanja će vršiti latentan pritisak na državne organe koji su nadležni za sprovođenje reformske agende, čime će se osigurati njena efikasna implementacija. Konstantan monitoring i redovno izvještavanje javnosti će prisiliti donosioce odluka na svim nivoima vlasti da efikasnije realizuju planirane mjere i aktivnosti.





## Održan drugi sastanak Radne grupe za pojednostavljenje procedura prikupljanja statističkih podataka

U prostorijama Federalnog zavoda za statistiku 31. januara 2020. godine održan je drugi sastanak Radne grupe za pojednostavljenje procedura prikupljanja statističkih podataka koju čine predstavnici Udruženja poslodavaca Federacije BiH i Federalnog zavoda za statistiku. Sastanku su izuzev članova Radne grupe prisustvovali i šef odsjeka za statistiku pravosuđa, kulture, inovacija, zdravstva i gender statistika, te šef odsjeka za statistiku cijena.

Na sastanku su razmatrana tri obrasca koja su privredni subjekti dužni popunjavati i dostaviti Federalnom zavodu za statistiku, a to su: INOV (Inovativne aktivnosti preduzeća), IR-1 (Godišnji izvještaj o istraživanju i razvoju preduzeća) i C-41 DOM (Mjesečni izvještaj o prodajnim cijenama proizvođača industrijskih proizvoda).

Zaključeno je da će u narednom periodu predstavnici Federalnog zavoda za statistiku raditi na skraćivanju INOV obrasca, u smislu brisanja određenih pitanja iz obrasca za koja se ustanovi da je moguće povlačiti takve informacije iz drugih izvora. Na taj način dovest će se do uštede vremena prilikom popunjavanja obrasca.

U obrascu će se dodatno precizirati definicije određenih pojmova i staviti dodatna pojašnjenja, a kako bi se otklonile bilo kakve dileme prilikom popunjavanja obrazaca od strane privrednih subjekata.

Kada je u pitanju IR-1 obrazac predstavnici Federalnog zavoda za statistiku će napraviti IR-1 obrazac u excel tabeli koja će sadržavati određene kontrole/formule kako bi se privrednim subjektima olakšalo popunjavanje ovog obrasca, jer bi se obrazac



popunjavao i slao Zavodu putem elektronske pošte.

Sve članice Udruženja poslodavaca Federacije BiH, obaveznici popunjavanja obrazaca, svoje prijedloge za izmjenu obrasca koje imaju za cilj unaprijediti i olakšati popunjavanje

istih, mogu dostaviti preko članova Radne grupe ispred UPFBiH ili direktno Federalnom zavodu za statistiku. Svaki prijedlog će se predstavnici Federalnog zavoda za statistiku detaljno razmotriti.

## Veterinarske stanice žele pristupiti Udruženju poslodavaca FBiH

Predstavnici veterinarskih organizacija u Federaciji BiH, predvođeni direktorom Veterinarskog laboratorija „MULTI LAB“ d.o.o Tuzla Sanelom Hodžićem, održali su 17. januara 2020. godine sastanak sa direktorom Udruženja poslodavaca



FBiH Mladenom Pandurevićem i sekretarom Udruženja Mersihom Jusić, a kako bi razgovarali o mogućnosti učlanjenja u Udruženje i osnivanju grupacije za veterinarstvo.

Hodžić je istakao da postoje brojni problemi prilikom primjene zakona iz oblasti veterinarstva, a imajući u vidu da Udruženje poslodavaca FBiH djeluje na izmjene i dopune zakona, odnosno inicira njihove promjene, te učestvuje u izradi novih zakona i zakonskih propisa, smatra da svoje interese mogu ostvariti jedino kroz Udruženje poslodavaca FBiH, kao najreprezentativnije poslodavačke organizacije u FBiH.

"Vidimo šansu da kroz ovakav vid saradnje definitivno unaprijedimo i afirmišemo naše stavove i riješimo brojne nagomilane probleme struke", napomenuo je Hodžić.

## **Edukacija/upoznavanje građevinskih firmi sa projektom modela energetske efikasnosti**



U organizaciji Udruženja poslodavaca FBiH u prostorijama Sarajevske regionalne razvojne agencije SERDA, u srijedu 15. januara 2020. godine, održano je predstavljanje projekta Modela poboljšanja energetske efikasnosti (Model EE). Cilj sastanka je

upoznavanje sa projektom planiranim aktivnostima na utopljavanju objekata te animiranje građevinskih kompanija za aktivno uključenje u njihovu realizaciju.

Sarajevska regionalna razvojna agencija SERDA je u partnerstvu s Ministarstvom prostornog uređenja, građenja i zaštite okoliša Kantona Sarajevo (KS) implementira Model poboljšanja energetske efikasnosti (Model EE), kojim se želi postići da što veći broj građana pod povoljnijim uslovima izvrši energetske efikasno utopljavanje svojih objekata stanovanja.

Glavni cilj Modela energetske efikasnosti je sistemska podrška građanima u poboljšanju energetskih karakteristika, odnosno utopljavanju stambenih objekata, pod povoljnijim uvjetima. Efekti Modela energetske efikasnosti bit će vidljivi kroz smanjenje potrošnje energenata, prelazak sa grijanja čvrstim gorivima na grijanje ekološki prihvatljivijim gorivima, smanjenje zagađenosti zraka, ljepšu urbanističku sliku Kantona Sarajevo, duži životni vijek nekretnina i povećanje privrednih aktivnosti na području Kantona Sarajevo.



Građevinske kompanije iskazale su spremnost dati svoj maksimalan doprinos uspješnoj realizaciji projekta Model EE i aktivno uključenje u projekat. Prepoznali su važnost projekta za privrednu aktivnost u Kantonu Sarajevo, ali i ukazali na veliki problem nedostatka radne snage u oblasti građevinarstva koji bitno utiče na realizaciju i planiranje aktivnosti. Ukazali su i na potrebu aktivnog ispitivanja tržišta prilikom projektovanja mjera energetske efikasnosti kako bi se nepredviđeni i neplanirani radovi sveli na minimalnu mjeru.



## Većina prijedloga UPFBiH inkorporirane u Strategiju razvoja FBiH 2021-2027

Članovi Koordinacionog odbora za izradu Strategije razvoja FBiH 2021-2027 ispred Udruženja poslodavaca FBiH Ekrem Turajlić i Husein Al-Baldawi 28. januara 2020. godine odežali su sastanak sa direktorom Federalnog zavoda za programiranje razvoja gospodinom Ljubišom Đapanom.

Strategija razvoja Federacije Bosne i Hercegovine je integrisani, multisektorski strateški dokument koji definira javne politike i usmjerava ekonomsko-socijalni razvoj Federacije, a Udruženje poslodavaca FBiH je



imenovalo svoje predstavnike za članove podgrupa koji su aktivno učestvovali i dali konkretne prijedloge za izradu Strategije kao i zastupali interese i stavove poslodavaca.

Strategija razvoja će biti podloga i osnov za izradu godišnjih i trogodišnjih planova federalnih institucija, a Đapan je na sastanku izvjestio predstavnike UPFBiH o progresu izrade Strategije, te je istakao da je većina prijedloga Udruženja inkorporirane u Strategiju.




## Inicirani sastanci sa međunarodnim organizacijama u BiH

U cilju unapređenja saradnje i zajedničkog djelovanja u domenu podrške implementaciji reformske agende „Zajedničke socioekonomske reforme za period 2019 - 2022. godina" i inicijativi Udruženja poslodavaca FBiH o ukidanju i smanjenju parafiskalnih nameta, kao i podršci usvajanju zakonskih rješenja koje je predložilo Udruženje a tiču se zakona koji će unaprijediti poslovni ambijenti, Udruženje poslodavaca FBiH uputilo je Delegaciji EU u BiH, Misiji Međunarodnog monetarnog fonda u BiH i Kancelariji Svjetske banke u BiH poziv na sastanak.

Na sastanku bi se predstavnici međunarodnih organizacija upoznali sa prioritetima djelovanja Agende.

Cilj sastanka jeste zajednički rad na usvajanju i efikasnoj implementaciji nove reformske agende i inicijative Udruženja čiji su ciljevi u velikoj mjeri identični i komplementarni.





## Edukacija „Uputstvo o dostavljanju podataka iz knjigovodstvenih evidencija elektronskim putem“

Udruženje poslodavaca FBiH u saradnji sa Upravom za indirektno oporezivanje BiH organizuje besplatnu edukaciju „Uputstvo o dostavljanju podataka iz knjigovodstvenih evidencija elektronskim putem“. Planirano je održavanje edukacije u četiri grada Federacije BiH i to u Bihaću, Tuzli, Širokom Brijegu i Zenici.

Prva edukacija održat će se 18. februara 2020.godine u prostorijama kompanije Feal (ul. Trnska cesta br.146) u Širokom Brijegu sa početkom u 11:00 časova.

Edukaciju će voditi dr.sc. Jozo Piljić, Uprava za indirektno oporezivanje u BiH Banja Luka (RC Tuzla Šef grupe za podršku).

Cilj besplatne edukacije poslodavaca je da se u praksi obezbijedi pravilna primjena Uputstva o dostavljanju podataka iz knjigovodstvenih evidencija elektronskim putem, te poslodavcima daju pojašnjenja primjene pojedinih odredaba navedenog Uputstva.

Na edukaciji će se raspravljati o sljedećim temama:

- a) Elektronsko dostavljanje podataka iz knjigovodstvenih evidencija
- b) Prilagođavanje postojećih sistema za elektronsko dostavljanje podataka
- c) Lica ovlaštena za dostavljanje elektronskih evidencija
- d) Rok, način i format dostavljanja elektronske evidencije
- e) Šta je i kako se pravi CSV format
- f) Početak obavezne dostave elektronske evidencije

## Predstavnici UPFBiH i BHRT o detaljima televizijskog prenosa dodjele nagrade "Emerik Blum"




Direktor Udruženja poslodavaca FBiH Mladen Pandurević održao je 29. januara 2020. godine sastanak sa pomoćnicom generalnog direktora BHRT za razvoj Dženitom Jusufbegović isaradnicima.

Na sastanku je razgovarano o medijskom pokroviteljstvu Dana poslodavaca i svečane dodjele nagrade za najboljeg menadžera 2019. godine u FBiH "Emerik Blum", odnosno o tehničkim detaljima koje je potrebno realizovati tokom ovog događaja i aktivnostima koje će prethoditi svečanosti. U narednom periodu očekuje se potpisivanje ugovora između UPFBiH i BHRT.



## Održan sastanak Grupacije poslodavaca Unsko-sanskog kantona pri UPFBiH sa kantonalnim ministrom privrede

U prostorijama Ministarstva privrede Unsko-sanskog kantona 27. januara 2020. ministar Nijaz Kadirić je primio predstavnike Grupacije poslodavaca USK pri UPFBiH Edina



Ibrahimpasića, Ibrahima Đedovića, Ejuba Topića i Husu Bošnjaka, a kako bi pokušali iznaći rješenje problema ferijalne prakse učenika.

Naime, Grupacija poslodavaca USK-a je početkom oktobra 2019. godine uputila Incijativu za rješavanje problema u vezi sa formiranjem učeničkih zadruga na području USK. Pitanje praktične nastave i formiranje učeničkih zadruga propisano je Zakonom o visokom obrazovanju USK, ali se u praksi ne primjenjuje. Također, 2012. godine donesen je i Pravilnik o učeničkim zadrugama koji nije usklađen sa pomenutim zakonom.

Na sastanku su predstavnici Grupacije istaknuli da je potrebno donijeti novi pravilnik koji će biti usklađen sa Zakonom i kojim će regulisati osnivanje, ciljevi i druga pitanja od značaja za rad zadruga. Napomenuto je da je neophodno taj pravilnik donijeti što prije, kako bi se već na ljeto 2020. godine isti mogao i primjeniti. Zaključeno je da će se sljedeći sastanak održati početkom februara, na kojem će predstavnici Vlade USK pripremiti potrebne informacije i materijale za izmjene i dopune Pravilnika o učeničkim zadrugama.

## Održana XX sjednica Ekonomsko-socijalnog vijeća ZDK



Na sjednici Ekonomsko-socijalnog vijeća ZDK, održanoj 29. januara 2020. godine, razmatran je Izvještaj o implementaciji Akcionog plana za provođenje Strategije zapošljavanja ZDK za 2019. godinu i Informacija o stanju u oblasti zapošljavanja na području ZDK za 2019. godinu.

Predsjednik Grupacije poslodavaca ZE-DO kantona pri UPFBiH Kasim Kotorić istakao je da poslodavci prihvataju predloženi Akcioni plan o provođenju Strategije zapošljavanja ZDK za 2019. godinu.

Nadalje, Kotorić je naglasio da je Udruženje poslodavaca FBiH, čija je Grupacija poslodavaca ZDK organizacioni dio, iniciralo izmjene Zakon o posredovanju u zapošljavanju i socijalnoj sigurnosti nezaposlenih osoba FBiH, Zakon o zaštiti na radu FBiH, Zakon o zdravstvenoj zaštiti FBiH i Zakon o zdravstvenom osiguranju FBiH, te da će se reformom ovih zakona omogućiti da Službe za zapošljavanje razlikuje lica koja traže posao od onih koji su na evidencijama službi za zapošljavanje samo zbog određenih socijalnih davanja, zdravstvene i socijalne zaštite.

Na sjednici su poslodavci istakli da su potrebni veći napori Vlade ZDK i resornih ministarstava u suzbijanju sive ekonomije, a u cilju jačanja konkurentnosti privrede u našoj zemlji. Zaključeno je da će Ekonomsko-socijalno vijeće ZDK uputiti apel nadležnim ministarstvima kako bi se, na što kvalitetniji način, realizirati ciljevi zadati u Akcionom planu za provođenje strategije zapošljavanja ZDK za 2019. godinu.

## Nova članica UPFBiH - IN/OUT arh studio



Studio "IN/OUT arh studio" osnovan je 2008. godine, nakon višegodišnjeg iskustva u planiranju, arhitekturi i dizajnu.

Uspješna implementacija projekata postignuta je u saradnji s kvalificiranim savjetnicima, odgovornim za različita područja dizajna, realizacije projekata, nabavke različitih materijala i opreme, tehničke podrške itd.

Primarni cilj ove kompanije je zadovoljan klijent. Rad kompanije se zasniva na međusobnom povjerenju klijenta i dizajnera što rezultira uspješnim projektima.

Više informacija o kompaniji na [LINKU](#).

## Poziv poslodavcima da se registruju na web portal Federalnog zavoda za zapošljavanje

### UVODI SE NOVI SISTEM APLICIRANJA NA PROGRAME ZAPOŠLJAVANJA

Federalni zavod za zapošljavanje od 2020. godine uvodi novi sistem apliciranja na programe sufinansiranja zapošljavanja. U sklopu novog sistema, svaki poslodavac se mora prethodno registrovati na web portalu Federalnog zavoda za zapošljavanje ([www.fzzz.ba](http://www.fzzz.ba)). Ovo se odnosi kako na one poslodavce




koji imaju namjeru sudjelovati u programima sufinansiranja zapošljavanja po prvi put tako i na one koji su već sudjelovali. Poslodavci će se na web portalu Federalnog zavoda za zapošljavanje moći registrovati od 3.2.2020. godine.

Isto predstavlja nužan preduvjet za sudjelovanje u programima sufinansiranja zapošljavanja, odnosno podnošenje prijave za učešće u istim. Na navedeni način, poslodavcima se olakšava i ubrzava sam postupak apliciranja za poticajna sredstva. Podatke koje poslovnici popune prilikom registracije neće morati ponovno unositi prilikom prijavljivanja na javni poziv.

### KAKO SE REGISTROVATI?

Registracija se vrši putem web portala Federalnog zavoda za zapošljavanje klikom na opciju „Registracija“ nakon čega se slijede upute, odnosno unose traženi podaci u odgovarajuća polja. Nakon unosa traženih podataka provjerava se validnost istih, nakon čega se poslodavci putem email-a obavještavaju da li je proces registracije uspješno završen.





Uspješno izvršena registracija je preduvjet za sudjelovanje u javnim pozivima za sufinansiranje zapošljavanja nezaposlenih osoba.

Nakon uspješno izvršene registracije, a po objavi Javnog poziva, poslodavac se putem korisničkog imena i lozinke, koje je sam odredio prilikom registracije, prijavljuje na web portal Federalnog zavoda za zapošljavanje, a zatim klikom na meni „Projekti” pristupa dijelu gdje se omogućuje podnošenje prijave za učešće u programu sufinansiranja zapošljavanja.

Registracija je nužna i za korištenje drugih usluga poput posredovanja i objavljivanja oglasa. Naime, ukoliko poslodavci namjeravaju koristiti bilo koju od navedenih usluga, uključujući i sudjelovanje u programima sufinansiranja zapošljavanja, potrebno je da isti izvrše registraciju na web portalu Federalnog zavoda za zapošljavanje.

#### **UPUTSTVO ZA VEĆ REGISTROVANE POSLODAVCE**

Poslodavci koji su već registrovani potrebno je da izvrše reregistraciju. Reregistracija, odnosno provjera ispravnosti unesenih podataka vrši se prijavljivanjem na web portal Federalnog zavoda za zapošljavanje koristeći postojeće korisničko ime i lozinku, prilikom čega će se od poslodavca tražiti ažuriranje i/ili dopuna određenih podataka.

#### **VAŽNA NAPOMENA**

Poslodavci koji namjeravaju sudjelovati u programima sufinansiranja zapošljavanja, prilikom registracije, moraju unijeti glavni identifikacijski broj, kao i broj glavnog računa (ukoliko imaju više ID brojeva i računa, odnosno podružnica), jer će biti razmatrane samo prijave onih poslodavaca koji su aplicirali od i u ime sjedišta firme, a ne podružnica.

#### **KONTAKT**

U slučaju nejasnoća molimo kontaktirajte Federalni zavod za zapošljavanje putem e-maila: [info@fzzz.ba](mailto:info@fzzz.ba).



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**